

## AOB

### [EZ DUT IKUSTEN]

Ez dut ikusten  
juxtu entzuten  
abarrotsaren erdian  
ez da azaltzen  
ez da isiltzen  
ihardun luzeko  
xoria.

Umetzarotik  
dut ezagutzen  
berri zitzaidan  
goiza oraindik  
lehen orduan  
aditu nuen  
eguraldia  
aproposa zen.

Udaberriko euritan ere  
gogoratzen dut. Zelaiak eta  
bide bazterrak, loratu gabe  
artean. Artean ez zen  
harrez geroko euritakorik,  
zakua janzten genuen, txano  
gisara jarritz,  
orduan.

Eta xoria –sasi-xoria?–  
zenbat egunez kantu luzean  
betiko leku gordetan ihardun  
ta ihardun.